

MOTEYI

[Mokapo 1](#) – [Mokapo 2](#) – [Mokapo 3](#) – [Mokapo 4](#) – [Mokapo 5](#) – [Mokapo 6](#) – [Mokapo 7](#) – [Mokapo 8](#) – [Mokapo 9](#) – [Mokapo 10](#) – [Mokapo 11](#) – [Mokapo 12](#)

1 Mokapo 1

1. Maloba ya Moteyi, mwana ya David, mokonzi na Yerusaleme. 2. Bozangi tina ya bozangi tina, elobi moteyi ; Nionso ezangi tina.

3. Litomba nini na mutu azali na yango na minioko na ye nionso oyo aminiokolaka na se ya moyi? 4. Jeneratio moko ekendaka, pe jeneatio moko ekoya; pe mabele ekowumela tii lelo. 5. Moyi ebimaka, pe moyi elalaka, pe ekiamaka mbangu na esika na yango, esika ebimi. 6. Mopepe ekendeke epayi ya sudi, pe ebalukaka epayi ya nor; ebalukaka pe ezongaka; pe mopepe ezongelaka kobaluka na yango. 7. Bibale nionso etiolaka ti na *mer*, pe *mer* etondaka te; esika bibale ekendaka, kuna ekendaka lisusu. 8. Biloko nionso esalaka, mutu akoki koloba te; lisu etondoka na komona te, pe litoyi etondoka na koyoka te. 9. Oyo ezalaki ezali oyo ekozala; pe oyo esalamaki ezali oyo ekosalama; pe ezali na eloko moko te ya sika na se ya moyi. 10. Ezali na eloko moko te oyo tokoki koloba na tina na yango: Tala oyo ezali ya sika? -Ezalaki wuta kala, na bikeke oyo ezalaka liboso. 11. Ezali na bokundoli te ya biloko oyo elekaki liboso; pe na lolenge moko, bokundoli ekozala te ya biloko kati na baoyo bakoya sima.

12. Ngai, moteyi, nazalaki mokonzi ya Israel na Yerusaleme. 13. Pe natiaki motema na ngai pona kolukaluka pe pona koluka na bozindo na nzela ya bwania nionso oyo esalamaka na se ya mokili: ezali mosala ya pamba oyo Nzambe apesa bana ya batu ete baniokwama na kati na yango. 14. Namoni misala nionso oyo esalamaka na se ya moyi; pe tala, nionso ezali bozangi tina pe bolandi mopepe. 15. Oyo ezali ya kogumbama ekoki kosembolama te, pe oyo ezangi ekoki kotangama te.

16. Nalobi kati na motema na ngai, nalobi: Tala, nakomi monene, pe nazui bwania koleka banso oyo bazalaki liboso na ngai na Yerusaleme, pe motema na ngai emonaki bwania pe boyebi. 17. Pe natiaki motema na ngai pona koyeba bwania, pe pona koyeba liboma pe bozoba. Nayebi ete oyo pe ezali bolandi mopepe. 18. Pamba te na kati ya bwania mingi ezali na mawa mingi; pe oyo abakisi boyebi, abakisi mpasi.

2 Mokapo 2

1. Nalobi kati na motema na ngai: Tokende! Nakomeka yo na nzela ya bilengi: yango wana sepela na bolamu. Pe tala, oyo wana pe ezali bozangi tina. 2. Nalobaki na koseka: Ozali zoba; pe na esengo: Ozali kosala nini? 3.

Nalukaki na bozindo ya motema na ngai pona kokembisa mosuni na ngai na vino, pe na kotambwisa motema na ngai na bwania, pe pona kosimba bozoba, kino namona bolamu nini ekozala pona bana ya batu, bolamu oyo bakosala na se mokili na mikolo nionso ya bomoi na bango.

4. Nasali misala minene: Namitongi bandaku, namiloni bavino; 5. Pona ngai moko, nasali bilanga pe baparke, pe nalonaki kati na yango banzete ya bambuma nionso; 6. Namisaleli maziba ya mayi pona kosopela zamba ezali kobimisa banzete. 7. Nasombaki bawumbu ya mibali pe basi, pe basusu babotami na ndaku na ngai; Nazalaki pe lisusu na bitonga ya bibwele minene pe ya mike, na motango monene, koleka baoyo nionso bazalaki liboso na ngai na Yerusaleme. 8. Namibombi pe palata pe wolo, pe bomengo ya bakonzi pe ya bituka; Nasalaki pona ngai moko bayembi ya mibali pe ya basi, pe bisengo ya bana ya mutu, mwasi pe basi ya lokumu moke. 9. Pe nakomaki monene pe nalekaki lisusu mingi baoyo nionso bazalaki liboso na ngai na Yerusaleme; pe bwania na ngai ezalaki elongo na ngai. 10. Pe nionso oyo misu na ngai elingaki, napekiselaki ye yango te; Nazangisaki motema na ngai esengo moko te, po motema na ngai esepelaki na mosala na ngai nionso, yango oyo eteni na ngai na mosala na ngai nionso. 11. Pe natalaki misala nionso oyo maboko na ngai esalaki, pe epayi mosala nionso oyo namonaki pasi pona kosala yango; pe, tala, nionso ezalaki bozangi tina pe bolandi mopepe, pe ezalaki na litomba moko te na se ya moyi.

12. Pe nabalukaki pona kotala bwania, pe liboma, pe bozoba; po ete mutu oyo akoya sima ya mokonzi akosala nini? -oyo esi esalemi. 13. Pe namoni ete bwania ezali na litomba likolo ya liboma, lokola pole ezali na litomba likolo ya molili. 14. Mutu ya bwania azali na misu na ye na moto, pe liboma atambolaka na molili; kasi ngai pe nasosolaki ete likambu moko ekokomela bango nionso. 15. Pe nalobaki na motema na ngai: suka ya liboma ekokomela ngai pe; pe pona nini nazali bwania boye? Pe nalobaki na motema na ngai ete oyo pe ezali bozangi tina. 16. Pamba te mutu ya bwania akokanisama soko moke te koleka oyo ya liboma, pamba te na mikolo ekoya, nionso ebosanami. Pe ndenge nini mutu ya bwania akufaka lokola mutu ya liboma ? 17. Pe nayinaki bomoyi, pamba te mosala nionso oyo esalemi na se ya moyi ezalaki mokumba pona ngai, po nionso ezali bozangi tina pe bolandi mopepe. 18. Pe nayinaki mosala nionso oyo nasalaki na se ya moyi, po nasengeli kotika yango epayi ya mutu oyo akozala sima na ngai. 19. Nani ayebi soki akozala mutu ya bwania to zoba? Pe akozala nkolo ya misala na ngai nionso oyo nasalaki makasi pe oyo nasalaki na bwania na se ya moyi. Oyo pe ezali bozangi tina.

20. Na sima, motema na ngai ebandaki kolemba na tina ya mosala nionso oyo nasalaki na se ya moyi. 21. Po ezali na mutu oyo asali misala na bwania, pe na boyebi, pe na molende ya kolonga, pe nakotikela yango libula na mutu mosusu oyo niokwami te. Yango ezali bozangi tina pe mabe moko monene.

22. Po nini mutu azali na mosala na ye nionso pe na minioko nionso ya motema na ye oyo azali koniokwama na se ya moyi ? 23. Po mikolo na ye nionso ezali pasi, pe mosala na ye ezali kokumbela ye mawa; ata na butu

motema na ye ekopema te. Oyo pe ezali bozangi tina.

24. Eloko ya malamumu ezali te pona mutu bobele koliya pe komela, pe kosala ete molimo na ye esepela na bolamu na mosala na ye. Pe namonaki ete likambo oyo pe ewuti na loboko ya Nzambe. 25. Po nani akoki koliya, pe kosepela koleka ngai? 26. Pamba te, na mutu oyo azali malamumu liboso na ye, apesaka bwania pe boyebi pe esengo; kasi na oyo azali kosumuka apesaka mosala ya kosangisa pe kobomba, pona kopesa na oyo azali malamumu liboso ya Nzambe. Oyo pe ezali bozangi tina pe bolandi mopepe.

3 Mokapo 3

1. Ezali na eleko pona nionso, pe ezali na tango moko na likambu nionso na se ya moyi. 2. Tango moko ya kobotama, pe tango moko ya kokufa; tango moko ya kolona, pe tango moko ya kobuka biloko oyo elonamaki; 3. Tango moko ya koboma, pe tango moko ya kobikisa; tango moko ya kobuka, pe tango moko ya kotonga; 4. Tango moko ya kolela, pe tango moko ya koseka; tango moko ya komitungisa, pe tango moko ya kopumbwa na esengo; 5. Tango moko ya kobwaka mabanga, pe tango moko ya kolokota mabanga; tango moko ya koyambana, pe tango moko ya koboya koyambana; 6. Tango moko ya koluka, pe tango moko ya kobungisa; tango moko ya kobatela, pe tango moko ya kobwaka; 7. Tango moko ya kopasola, pe tango moko ya kotonga; tango moko ya kofanda nye, pe tango moko ya koloba; 8. Tango moko ya kolinga, pe tango moko ya koyina; tango moko ya bitumba, pe tango moko ya kimia.

9. Oyo asalaka, litomba nini azuaka na oyo asalaka? 10. Namoni mosala oyo Nzambe apesi bana ya batu po basala balemba : 11. Asalaki eloko nionso kitoko na tango na yango; pe atiaki mokili o kati ya mitema na bango, boye mutu akoki te komona wuta ebandeli kino suka mosala oyo Nzambe asali.

12. Nayebi ete eloko ya malamumu ezali te pona bango longola se kosepela pe kosala malamumu tango bazali na bomoyi; 13. Pe lisusu ete mutu nionso azali kolia pe komela, pe kosepela na bolamu na mosala na ye nionso: yango ezali likabo ya Nzambe. 14. Nayebi ete nionso oyo Nzambe asalaka ewumelaka libela; ezali na eloko moko te ya kobakisa na yango, to eloko moko te ya kolongola na yango; pe Nzambe asalaka yango, po ete bazala na bobangi liboso na ye. 15. Oyo ezali esila kozala, pe oyo ekoya esila kala kokoma, pe Nzambe akoluka oyo ekima.

16. Pe namoni lisusu na se ya moyi ete na esika ya bosambisi wana nde mabe ezalaki, pe na esika ya boyengebene, wana nde mabe ezalaki. 17. Nalobaki na motema na ngai, Nzambe akosambisa bayengebene pe batu mabe; po ezali na tango moko wana pona likambu nionso pe pona mosala nionso.

18. Nalobaki na motema na ngai: na tina ya bana ya mutu, ezali bongo, ete Nzambe ameka bango, pe bango moko bamona ete bazali kaka banyama. 19. Pamba te lokola ekomelaka bana ya mutu, pe lokola ekomelaka

banyama; ezali na suka ndenge moko pona banso: ndenge oyo akufaka, ndenge moko pe mosusu akufaka; pe bango banso bazali na pema moko, pe mutu azali na litomba te likolo ya nyama, po nionso ezali bozangi tina. 20. Nionso ekendaka esika moko, nionso ezali putulu, pe nionso ezongaka na putulu. 21. Nani ayebi soki pema ya bana ya mutu yango ekomata likolo, pe pema ya nyama ekokita na se ya mabele? 22. Pe namoni ete ezali na eloko moko te oyo eleki oyo: mutu asepele na oyo azali kosala, po yango ezali eteni na ye; po nani akomema ye pona amona nini ekosalema sima na ye?

4 Mokapo 4

1. Pe nabalukaki, pe namoni minioko nionso oyo esalemaka na se ya moyi; pe tala pinzoli ya baniokwami, pe pona bango molendisi azali te! Pe nguya makasi ezali na loboko ya baniokoli na bango, pe pona bango molendisi azali te! 2. Yango wana namoni batu ya esengo bakufi oyo basila kokufa, koleka batu ya bomoyi oyo bazali nanu kobika. 3. Pe kutu batu ya esengo koleka bango mibale ezali oyo azali nanu te, oyo amoni te mosala ya mabe oyo ezosalama na se ya moyi.

4. Pe namoni mosala ya pasi pe elonga nionso na mosala: ete ezali zuwa ya mutu epayi na mozalani na ye. Oyo pe ezali bozangi tina pe bolandi mopepe.

5. Zoba akanga maboko pe aliaka mosuni na ye moko.

6. Malamu koleka loboko etondi pe ezali na bopemi, eleki maboko mibale etondi na mosala ya pasi pe bolandi mopepe.

7. Nabalukaki, pe namoni bozangi tina na se ya moyi. 8. Ezali na oyo azali ye moko azangi lisungi: lisusu azali na mwana te, pe na ndeko te, pe pasi ya misala na ye nionso eza na suka te; pe lisu na ye etondi na bomengo te, pe amilobaka te ete: Pona nani nazali koniokwama, pe nazali komipekisa bisengo? Oyo pe ezali bozangi tina pe mosala ezanga matondi.

9. Mibale baleki moko; po bazali na lifuti ya malamumu na mosala na bango. 10. Pamba te soki bakweyi, moko akotelemisa moninga na ye; kasi mawa na ye oyo azali se ye moko, soki pe akweyi, azali na lisungi te pona kotombola ye! 11. Ndenge moko pe, soki mibale balali, bakozala na moto; kasi ye oyo azali ye moko, ndenge nini akozala na moto? 12. Soki mutu moko alongi oyo azali ye moko, mibale bakotelemela ye; pe kamba ya singa misatu ebukanaka nokinoki te.

13. Malamumu elenge mobali ya mobola pe ya bwania po aleki mokonzi ya mobange pe ya zoba oyo ayebi lisusu kokebisama te. 14. Pamba te abimaki na ndaku ya bakangami pona koyangela, ata abotamaki mobola na bokonzi na ye.

15. Namoni batu nionso ya bomoyi oyo batambolaka na se ya moyi, elongo na elenge mobali, ya mibale, oyo akozwa esika na ye. 16. Ezali na suka te na batu nionso, na baoyo nionso oyo bazalaki liboso na bango; nzokande baoyo bakoya sima bakosepele na ye te. Po oyo pe ezali bozangi tina pe bolandi mopepe.

5 Mokapo 5

1. Keba na makolo na yo, tangu ozokende na ndaku ya Nzambe, pe pusana pene pona koyoka, na esika ya kopesa mbeka ya bazoba; po bayebi te ete bakosala mabe.

2. Kowelesisa monoko na yo te, pe motema na yo ewelela te na koloba ata liloba moko liboso ya Nzambe; po Nzambe azali na likolo, pe yo ozali na mabele: yango wana maloba na yo ezala moke. 3. Po ndoto ewutaka na mitungisi mingi, pe mongongo ya zoba na maloba mingi.

4. Tango okolapa ndayi epayi ya Nzambe, kowumela te pona kokokisa yango; po asepelaka na bazoba te. 5. Ezali malamumu olaka te na esika ya kolapa ndayi pe kokokisa yango te. 6. Kotika monoko na yo te ememisa nzoto na yo masumu, pe koloba liboso ya anjelu te ete ezali libunga. Pona nini Nzambe asilikela mongongo na yo, pe abebisa mosala ya maboko na yo? 7. Pamba te na ebele ya bandoto ezali na makambu ya pamba, pe lisusu na maloba mingi; kasi banga Nzambe.

8. Soki omoni na mboka moko, bakoniokola babola pe boyengebene na bosembo bakosalela yango te, kokamwa te na tina na yango; po ezali na moko oyo azali likolo koleka baoyo bazali likolo, pe azali kokeba, pe likolo na bango ezali na oyo aleki bango likolo. 9. Mabele ezali na litomba na makambu nionso, ata mokonzi azali mowumbu ya mabele. 10. Oyo alingi mbongo atondaka mbongo te, pe oyo alingaka bomengo atondaka na bozui te. Oyo pe ezali bozangi tina. 11. Tangu bozui ekomi ebele, baoyo baliaka yango pe babakisami lokola; pe litomba nini nkolo bozui azali na yango, longola se soki azali komona yango na miso na ye moko? 12. Pongi ezali elengi pona oyo asalaka, ata alie moke to mingi; kasi kotonda ya mozwi etikaka ye alala te.

13. Ezali na mabe moko ya pasi oyo namoni na se ya moyi: bomengo bankolo na yango babombi pona mbeba na bango, 14. To bomengo yango ebebisami na likambo moko ya mawa, pe aboti mwana mobali, pe azali na eloko te na loboko na ye. 15. Lolenge abimaki na libumu ya mama na ye, akozonga bolumbu, kokende ndenge ayaki, pe akomema eloko te ya mosala na ye oyo akoki kosimba na loboko na ye. 16. Pe oyo pe ezali mabe moko ya pasi, ete kaka ndenge ayaki, ndenge moko azali kokende; pe litomba nini azali na yango na mosala asalaki pona mopepe ? 17. Lisusu aliaka na molili mikolo nionso ya bomoyi na ye, pe ayokaka mawa mingi, pe azali na bokono pe kanda.

18. Tala oyo namoni malamumu pe kitoko : ezali kolia pe komela pe komona bolamu bolamu kati na mosala nionso oyo nakiokwamaka na se ya moyi mikolo nionso ya bomoyi na ye, oyo Nzambe apes aye ; po yango nde eteni na ye. 19. Pe lisusu mutu nionso oyo Nzambe apesi ye bomengo pe biloko, pe nguyaya ya kolia yango, pe ya kozua eteni na ye pe kosepela na mosala na ye, oyo ezali likabo ya Nzambe ; 20. Po akomikundola mingi te mikolo ya bomoyi na ye; po Nzambe apesi ye eyano kati na esengo ya

motema na ye.

6 Mokapo 6

1. Ezali na mabe oyo namoni na se ya moyi, pe oyo ezali monene kati na batu : 2. Ezali na mutu oyo Nzambe apesi ye bomengo, na biloko, pe lokumu, pe molimo na ye ezangi eloko te na nionso oyo azali na posa na yango; pe Nzambe apesi ye nguya ya koliya yango te, po mopaya moko akoliya yango. Oyo ezali bozangi tina pe mabe ya pasi. 3. Soki mutu moko aboti bana mbala kama, pe abiki bomoyi mbula mingi, pe mikolo ya mbula na ye ezali mingi, pe molimo na ye etondi na bolamu te, pe lisusu azali na bokundi te, nalobi ete malamumu mwana akufa na libumu aleki ye ; 4. Pamba te ye oyo ayaki pamba, pe akokenda na molili, pe kombo na ye ezipami na molili; 5. Pe lisusu amonaki te pe ayebaki moyi te: ye oyo azali na bopemi mingi koleka oyo. 6. Soki abikaki na bomoi mbala mibale na mbula nkoto, pe alingaki komona esengo te: bango nionso bakokende na esika moko te?

7. Mosala pasi nionso ya mutu ezali pona monoko na ye, kasi mongongo na ye etondisami te. 8. Litomba nini mutu ya bwania azali na yango koleka zoba? Litomba nini azali na yango mobola oyo ayebi kotambola liboso ya batu ya bomoyi? 9. Komona malamumu ya misu ezali malamumu koleka baposa. Oyo pe ezali bozangi tina pe bolandi mopepe. 10. Oyo ezali esila kobengama na kombo na yango; pe toyebi ete mutu akoki te kowelana na ye oyo aleki ye makasi. 11. Pamba te ezali na maloba mingi oyo ebakisaka makambu ya pamba : litomba nini mutu azali na yango. 12. Po nani ayebi nini ezali malamumu pona mutu na kati ya bomoyi, mikolo nionso ya bomoyi na ye ezanga tina, oyo ekoleka lokola elili? Pe nani akoyebisa mutu nini ekosalama sima na ye na se ya moyi?

7 Mokapo 7

1. Kombo ya malamumu eleki mafuta ya motuya, pe mukolo ya liwa eleki mukolo oyo mutu abotamaki. 2. Ezali malamumu kokende na ndaku ya matanga na esika ya kokende na ndaku ya bafeti, pamba te kuna ezali suka ya mutu nionso; pe oyo azali na bomoyi batiaka likambu yango na motema. 3. Mawa eleki koseka na malamumu, po na kati ya mawa ya elongi, motema ekomi malamumu. 4. Motema ya batu ya bwania ezali na ndaku ya matanga, kasi motema ya bazoba ezali na ndaku ya esengo. 5. Ezali malamumu koyoka mpamela ya mutu ya bwania, na esika ya koyoka loyembo ya bazoba. 6. Pamba te lokola lokito ya banzube na se ya nzungu, koseka ya zoba ezali bongo. Oyo pe ezali bozangi tina.

7. Po minioko ekomisaka mutu ya bwania liboma, pe kaniaka ebebisaka motema. 8. Suka ya likambu eleki ebandeli na yango. Elimo ya motema molayi eleki elimo ya lolendo. 9. Kosala mbangumbangu te na molimo na yo pona kosilika, po kanda epema na ntolo ya bazoba.

10. Koloba te: Ndenge nini mikolo oyo elekaki ezalaki malamumu koleka mikolo oyo? Po ezali te na nzela ya bwania nde ozali kotuna na tina ya likambu oyo. 11. Bwiania ezali malamumu lokola libula, pe ezali na litomba pona baoyo bazali komona moyi; 12. Po na elili ya bwiania ezali na elili ya mbongo; kasi litomba ya boyebi ezali ete bwiania epesaka bomoyi na moto oyo azali na yango.

13. Tala mosala ya Nzambe, po nani akoki kosembola oyo angumba?

14. Na mukolo ya malamumu zala kati na malamumu, pe na mukolo ya mikakatano, tala : po Nzambe Nzambe asalaki oyo lokola pe mosusu, po ete mutu amona eloko moko te oyo ekoya sima na ye.

15. Namoni nionso oyo na mikolo ya bozangi tina na ngai: ezali na moyengebene oyo azali kokufa na tina ya boyengebene na ye, pe ezali na mutu mabe oyo azali koyeyisa mikolo na ye molayi na nzela ya mabe na ye.

16. Kozala na boyengebene koleka ndelo te, pe kozala bwiania koleka ndelo te; pona nini okomibebisa? 17. Kozala mutu mabe koleka ndelo te, pe kozala zoba te. 18. -Ezali malamumu lisusu ete osimba likambu oyo pe olongola loboko na yo na yango te; po oyo abangaka Nzambe abimaka na makambu nionso.

19. Bwiania ekomisaka makasi mutu ya bwiania koleka bakonzi zomi ya nguya oyo bazali na kati ya engumba.

20. Ya solo, ezali na mutu moko te ya sembo na mokili oyo asalaka malamumu pe asumukaka te. 21. Lisusu kotiya motema na yo te na maloba nionso oyo elobami, noki te oyoka ete mowumbu na yo kolakela yo mabe 22. Pamba te motema na yo eyebi ete mbala mingi yo pe olakela basusu mabe. 23. Nionso oyo nameki na bwiania; Nalobaki: Nakozala mutu ya bwiania; kasi ezalaki mosika na ngai. 24. Oyo ezali mosika pe mozindo penza, nani akomona yango?

25. Nayengaki-yengaki, ngai, motema na ngai pona koyeba, kososola na bozindo, pe koluka bwiania pe tina ya makambu; pe koyeba mabe ya bozoba, pe bozoba ya liboma; 26. Pe namoni mwasi oyo azali bololo koleka liwa, oyo motema na ye ezali lokola miniama pe mitambo, pe maboko na ye ezali miniololo: oyo asepelisi Nzambe akobika ye, kasi mosumuki akokangama na ye. 27. Tala likambo oyo, oyo namoni, elobi Moteyi, na kotalaka moko na moko pona koluka tina. 28. oyo bomoto na ngai ezali koluka nanu pe oyo namonii te: Namoni mobali moko kati na bankoto, kasi mwasi moko kati na bango nionso namoni te. 29. Kaka, tala oyo namoni ete Nzambe asali mutu sembo; kasi balukaki kobana-banza na tembe mingi.

8 Mokapo 8

1. Nani azali lokola mutu ya bwiania ? Pe nani ayebi ndimbola ya makambu? Bwiania ya mutu engengisaka elongi na ye, pe makasi ya elongi na ye ebongwanaka. 2. Ngai: Bokeba na monoko ya mokonzi, na tina ya ndayi epayi ya Nzambe. 3. Kopota mbangu te na liboso na ye; kotelema te na kati ya likambu moko ya mabe; po nionso oyo alingi, asalaka; 4. Pamba te

liloba ya mokonzi ezali nguya, pe nani akoloba na ye: Osala nini?

5. Ye oyo akotosaka mobeko akoyeba pasi te; pe motema ya mutu ya bwania eyebi tangu oyo ebongi pe lolenge ya malamumu; 6. Po na makambu nionso ezali na tangu ebongi pe lolenge ya malamumu. Kasi minioko ya mutu etondi likolo na ye; 7. Po ayebi te nini ekokoma; pe ndenge nini ekokoma, nani akoyebisa ye yango?

8. Ezali na mutu moko te oyo azali na nguya likolo ya pema ya bomoyi pona kokanga pema ya bomoyi, pe ezali na mutu moko te oyo azali na nguya likolo ya mukolo ya liwa, pe ezali te na lolenge ya bokimi na tangu na etumba ya boye, pe mabe ekobikisa te baoyo basalaka yango. 9. Namoni nionso oyo, pe natie motema na ngai na mosala nionso oyo esalemaka na se ya moyi. Ezali na tangu oyo batu bakonzaka batu pona pasi na bango. 10. Pe kutu bongo namonaki batu mabe bakundami pe bazali kokende, kasi baoyo basalaki malamumu balongwaki na esika ya basantu, pe na kati ya engumba babosanaki bango. Oyo pe ezali bozangi tina.

11. Pamba te etumbu ya misala ya mabe esalamaka mbangu te, yango wana mitema ya bana ya batu na kati na bango etondi naposa ya kosala mabe. 12. Ata mosumuki asali mabe mbala kama pe abiki mikolo molayi, kasi nayebi ete nionso ekozala malamumu pona baoyo bazali kobanga Nzambe, po bazali kobanga liboso na ye; 13. Kasi bolamumu ekozala te pona mutu mabe, pe akoyeyisa mikolo na ye molayi te, lokola elili, po abangaka elongi ya Nzambe te. 14. Nalobaki ete ezali bozangi tina oyo esalamaka na mabele : ezali na bayengebene oyo makambu ekomelaka na lolenge ya mosala ya batu mabe, pe ezali na batu mabe oyo makambu ekomelaka bango na lolenge ya mosala ya bayengebene. Nalobi oyo pe ezali bozangi tina.

15. Nasanzoli esengo, pamba te ezali na eloko moko te ya malamumu pona mutu na se ya moyi, soki kaka koliya pe komela pe kosepela; pe yango nde ekotikala na ye na mosala na ye na mikolo ya bomoyi na ye oyo Nzambe apesi ye na se ya moyi. 16. Tangu natie motema na ngai po nakoyeba bwania pe nakotala makambu oyo esalamaka na mabele (po ezali na mutu mosusu oyo, ezala na moyi to na butu, amonaka pongi te na misu na ye), 17. Nde namoni mosala nionso ya Nzambe, pe mutu akoki te komona mosala nionso oyo esalamaka na se ya moyi : ata mutu asalaka pona koluka yango, kasi akomona yango te ; pe ata mutu ya bwania soki akani koyeba yango, akokkoka komona yango te.

9 Mokapo 9

1. Pamba te natie motema na ngai na makambu nionso oyo, pe nakomeka kotalela nionso oyo, ete bayengebene pe batu ya bwania, pe misala na bango ezali na loboko ya Nzambe: mutu ayebi bolingo to koyina te. Nionso ezali liboso na bango. 2. Nionso ekomelaka ndenge moko na batu nionso: likambu moko na moyengebene pe na mutu mabe, na mutu malamumu pe mutu ya peto, pe na mutu ya mbindo, na oyo apesaka mbeka pe na oyo apesaka mbeka te; lokola mutu malamumu, ndenge moko mosumuki; oyo alapi

ndayi, lokola oyo abanga kolapa ndayi. 3. Ezali mabe na makambu nionso oyo esalemaka na se ya moyi, ete likambu moko ekomelaka banso; pe lisusu mitema ya bana ya batu etondi mabe, pe liboma ezali na mitema na bango tangu bazali na bomoyi; pe sima na yango bakendaka epayi ya bakufi. 4. Po pona oyo akangami na batu nionso ya bomoyi, elikia ezali, po mbwa oyo aza na bomoyi eleki nkosi oyo ekufa. 5. Po batu ya bomoyi bayebi ete bakokufa; kasi bakufi bayebi ata eloko moko te; pe lifuti ezali lisusu te pona bango, po ete bokundoli na bango ebosana. 6. Bolingo na bango, pe koyina na bango, pe likunya na bango esili, pe bazali na eteni te libela na libela na nionso oyo esalemi na se ya moyi.

7. Kende kolia lipa na yo na esengo, pe komela vino na yo na motema ya esengo; po Nzambe asila kondima misala na yo. 8. Tika bilamba na yo ezala pembe na tangu nionso, pe mafuta ezanga te na moto na yo. 9. Tala bomoyi elongo na mwasi oyo olingaka, mikolo nionso ya bomoyi na yo oyo ezanga tina, oyo epesameli yo na se ya moyi, mikolo nionso na yo ya bozangi tina; po yango ezali eteni na yo na bomoyi pe na mosala na yo oyo osalaka na se ya moyi. 10. Nionso loboko na yo ekokoka kosala, sala na ndenge na nguya na yo; po ezali na mosala te, mabongisi te, boyebi te, bwania te, kati na Sheol, epayi ozali kokende.

11. Nabalukaki pe namoni na se ya moyi ete momekano ya mbangu ezali te po na baoyo bazali mbangu, to etumba na bato ya nguya, to lipa na batu ya bwania, to bomengo na bato ya mayele, to boboto na baoyo batonda boyebi; pamba te tangu pe bozangi tangu ekomelaka bango nionso. 12. Po lisusu mutu ayebi ngonga na ye te, lokola bambisi oyo bakangami na moniama ya mabe, pe lokola bandeke oyo bakangami na mitambu : lokola bango, bana na mutu bakangamaka na tangu mabe, tangu ekwelelaka bango na mbalakata

13. Namoni lisusu bwania oyo na se ya moyi, pe ezalaki monene pona ngai : 14. Ezalaki na engumba moke, pe batu moke na kati na yango; pe mokonzi moko monene ayaki kobundisa yango, pe azingaki yango, pe atongaki bisika minene ya bibundeli pona na yango; 15. Nzokande ezalaki kuna, mutu moko mobola pe ya bwania, oyo akangolaki engumba na nzela ya bwania na ye. Kasi mutu moko te amikundolaki mobola oyo. 16. Pe nalobaki: Bwania eleki nguya; kasi bwania ya mobola etiolami, pe maloba na ye bayokaka yango te. 17. Maloba ya batu ya bwania eyokamaka na kimia, koleka koganga ya mutu oyo azali koyangela na kati ya bazoba. 18. Bwania eleki bisaleli ya bitumba, pe mosumuki moko abebisaka bolamu mingi.

10Mokapo 10

1. Banzinzi ekufa ebimisaka solo mabe, esalaka ete mafuta ya mosali malasi epola; pe mwa liboma ezali na kilo koleka bwania pe kembo.

2. Motema ya mutu ya bwania ezali na loboko na ye ya mobali, pe motema ya zoba ezali na loboko na ye ya mwasi; 3. Pe ata soki zoba azali kotambola na nzela, azangi mayele, pe ayebisaka banso ete azali zoba.

4. Soki molimo ya guvernere etombolaki yo, kolongwa na esika na yo te; po bopolo epekisaka masumu minene.

5. Ezali na mabe oyo namoni na se ya moyi, lokola libunga oyo ewuti na guvernere : 6. bozangi mayele etiami na lokumu ya likolo, pe bazwi bavandi na esika ya kokitisama. 7. Namoni bawumbu likolo na bampunda, pe bakonzi bazali kotambola na mabele lokola bawumbu.

8. Oyo atimboli libulu akokweya na kati na yango; pe oyo abuki mir, nioka ekoswa ye. 9. Ye oyo abukaka mabanga akozoka; oyo apasolaka banzete amitiyaka na likama.

10. Soki ebende esili moto oyo azali kosalela yango asemboli songe na yango te, akosala makasi mingi; kasi bwania ezali na litomba pona komema elonga.

11. Soki nioka eswi po *loyembo* ezali te, oyo azali na monoko azali na litomba te.

12. Maloba ya monoko ya mutu na bwania etondi na ngolu, kasi mbebu ya zoba emeleka ye moko. 13. Ebandeli ya maloba ya monoko na ye ezali bozoba, pe suka ya monoko na ye ezali libunga ya mabe. 14. Pe zoba abakisaka maloba: Mutu ayebi te nini ekosalama; pe nini ekosalama sima na ye, nani akoyebisa ye? 15. Misala ya pasi ya bazoba ekolembisa bango, po bayebi te kokende na engumba.

16. Mawa na bino, mboka oyo ezali na elenge mobali lokola mokonzi na yango, pe oyo bakonzi na yango baliyaka na tongo-tongo! 17. Esengo na yo, mboka oyo mokonzi na yango azali mwana ya batu minene, pe bakonzi na yango baliyaka na tango esengeli pona kozongisa makasi na bango, kasi pona esengo ya komela te.

18. Na tina ya goyigoyi makasi, likolo ya ndaku ekolemba; pe pona maboko oyo ya bolembu ndaku ezali kotanga matanga ya mayi.

19. Tosalaka bileyi pona komisepelisa, pe vino esepelisaka bomoyi; kasi mbongo eyanolaka na nionso.

20. Kolakela mokonzi mabe te, ata na kati ya likanisi na yo, pe kolakela mozui mabe te na kati ya shambre oyo olalaka, po ndeke ya likolo akomema mongongo, pe oyo eazli na mapapu ekoyebisa maloba.

11 Mokapo 11

1. Bwaka lipa na yo likolo ya mayi, po sima ya mikolo mingi okokuta yango. 2. Pesa ndambu epayi na sambo, pe kutu na mwambe; po oyebi te mabe nini ekokoma na mabele.

3. Soki mapata etondi, ekosopa mbula na mabele; pe soki nzete ekweyi, epayi ya sudi to epayi ya nord, na esika oyo nzete yango ekweaki, kuna ekozala.

4. Ye oyo akotala mopepe, akolona te; pe ye oyo akotala mapata akobuka mbuma te. 5. Lokola oyebi te nzela ya elimo to ndenge nini mikuwa esalamaka na libumu ya mwasi zemi, lolenge wana pe oyebi mosala ya Nzambe oyo asalaka nionso. 6. Na tongo, Lona milona na yo, pe na pokwa

kopemisa loboko na yo te; po oyebi te oyo ekolonga, oyo to oyo, to soki nionso mibale ekozala malamumu ndenge moko.

7. Pole ezali malamumu, pe ezali malamumu na misu komona moyi; 8. Kasi soki mutu abiki bambula mingi, pe asepele na yango nionso, akanisa pe mikolo ya molili, po ezali mingi. Nionso oyo ezali koya ezali bozangi tina. 9. Sepela, elenge mobali, na bolenge na yo, pe tika motema na yo esepelisa yo na mikolo ya bolenge na yo, pe tambola na banzela ya motema na yo pe na lolenge ya misu na yo; kasi oyeba ete pona makambu wana nionso, Nzambe akomema yo na bosambisi. 10. Longola mawa na motema na yo pe sala mabe eleka mosika ya nzoto na yo; po ete bolenge pe tongo ya bomoyi ezali bozangi tina.

12Mokapo 12

1. Pe na mikolo ya bolenge na yo kanisa Mozalisi na yo, liboso ete mikolo mabe ekoma, pe yambo bambula ekoma, oyo okoloba ete, Nasepele na yango te; 2. Liboso ete moyi, pe pole, pe sanza, pe minzoto ekoma molili, pe mapata ezonga sima ya mbula; 3. Na mokolo oyo bakengeli ya ndaku balengaka, pe batu ya nguya bakonguma, pe oyo basi batutaka ble bazala na mosala te, po bazali moke, pe oyo batali oyo batalaka na fenetre bazala molili. 4. Pe esika baporté mibale ekangama na balabala; tango lokito ya libanga ya konika ble ekiti, pe kolamuka na mongongo ya ndeke, pe bayembi nionso ya bana basi balembi; 5. Tango lisusu bazali kobanga oyo ezali likolo, pe kolenga na nzela, pe tango nzete ya amande ekobima fololo, pe libanki ekomi kilo, pe baposa ezali lisusu te; (po mutu akokenda na esika na ye ya seko, pe na balabala baleli bazali kotambola na kolela;) 6. -Yambo ete singa ya palata ekatana, mbeki ya wolo epasuka, sani ebukana na liziba, pe mashini ebendaka mayi ekatana na liziba; 7. Pe putulu ezonga na mabele, ndenge ezalaki kuna, pe molimo ezonga epayi ya Nzambe oyo apesaki yango. 8. Bozangi tina ya bozinga tina, elobi moteyi; nionso ezali bozangi tina! 9. Pe lisusu, lokola moteyi azalaki bwania, azalaki kalokisa boyebi epayi ya batu; pe ayokaki pe alukaki, pe atiaki na molongo masese mingi. 10. Moteyi amiyekolaki pona koluka maloba ya kosepelisa; pe ekomami oyo ezali sembo, maloba ya bosolo. 11. Maloba ya batu ya bwania ezali lokola songe ya libende, pe babuku lokola basete oyo ekoti makasi: epesameli na mobateli moko. 12. Pe lisusu, mwana na ngai, tika ete oteyama na bango: kosala mikanda ebele ezali na suka te, pe boyekoli mingi elembisaka nzoto. 13. Toyoka suka ya nionso oyo elobami: Banga Nzambe, pe batela mitindo na ye; po yango wana ezali nionso ya mutu. 14. Po Nzambe akomema mosala nionso na kati ya bosambisi, nionso oyo ebombami, ezala malamumu to mabe.